

Na osnovu čl. 11. i 12. Zakona o Komisiji za vrijednosne papire ("Službene novine Federacije BiH", br. 39/98, 36/99, 33/04), a u skladu sa članom 14. i 16. Zakona o vrijednosnim papirima ("Službene novine Federacije BiH", br. 39/98 i 36/99) članom 7. i 11. Zakona o društvima za upravljanje fondovima i o investicionim fondovima ("Službene novine Federacije BiH", br. 41/98, 36/99, 36/00, 27/02, 44/02, 50/03, 70/04) i članom 124. Zakona o privrednim društvima ("Službene novine Federacije BiH", broj 23/99, 45/00, 2/02, 6/02, 29/03), Komisija za vrijednosne papire Federacije Bosne i Hercegovine, donosi

PRAVILNIK

O NAČINU UPISA I VOĐENJA REGISTRA EMITENATA VRIJEDNOSNIH PAPIRA KOD KOMISIJE ZA VRIJEDNOSNE PAPIRE FEDERACIJE BOSNE I HERCEGOVINE

I - OPĆE ODREDBE

Član 1.

Ovim pravilnikom propisuje se način upisa, način promjene upisa, obrasci koji se koriste za upis i promjenu upisa, donošenje rješenja o upisu i način uvida u Registar emitenata vrijednosnih papira kod Komisije za vrijednosne papire Federacije Bosne i Hercegovine (u daljem tekstu: Registar kod Komisije).

U Registar kod Komisije upisuju se sva pravna lica koja vrše emisiju vrijednosnih papira (u daljem tekstu: emitenti) u skladu sa Zakonom o vrijednosnim papirima.

II - PRIJAVA ZA UPIS U REGISTAR KOD KOMISIJE

1. Obrasci

Član 2.

Za sve upise i promjene upisa u Registru kod Komisije podnosi se prijava i odgovarajući prilozi uz prijavu.

Uz prijavu, podnosilac prijave je dužan da priloži isprave i dokaze, zavisno od predmeta upisa.

Prijavu uz upis potpisuje lice ovlašteno za zastupanje emitenta.

Član 2a.

Registar se sastoji od dva dijela: registra osnovnih i registra dodatnih podataka.

U registar osnovnih podataka upisuju se sljedeći podaci o:

- 1. osnovnom kapitalu emitenta: upisani i uplaćeni;*
- 2. vrijednosnom papiru: vrsta, klasa, serija, broj izdatih vrijednosnih papira, nominalna vrijednost, datum emisije, prava iz vrijednosnog papira odnosno obaveze emitenta (upravljačka i imovinska);*
- 3. nadzornom odboru emitenta: ime, prezime, JMB, navod o tome da li je član ili predsjednik nadzornog odbora, adresa prebivališta.*

U registar dodatnih podataka upisuju se sljedeći podaci o:

- 1. emitentu: firma i sjedište, matični broj subjekta upisa (MBS), šifra djelatnosti, povezana lica sa emitentom (učešće u kapitalu i dr.), poštanski broj, telefon, fax i e-mail adresa;*
- 2. licima ovlaštenim za zastupanje emitenta: ime i prezime, adresa prebivališta, grad-općina, poštanski broj, JMB;*
- 3. upravi emitenta: ime i prezime, JMB, funkcija, adresa prebivališta;*
- 4. finansijskom poslovanju emitenta i drugi podaci u skladu sa posebnom odlukom Komisije.*

Upis emitenta u Registar kod Komisije, promjena izvršenih upisa iz stava 2. ovog člana i brisanje emitenta iz Registra vrši se na osnovu rješenja po provedenom upravnom postupku.

Upis podataka iz stava 3. tač. 1- 3. ovog člana, kao i promjena tih upisa, vrši se neposredno, bez provođenja upravnog postupka, upisom u Registar na osnovu prijave emitenta, u skladu sa zakonom, ovim pravilnikom i drugim propisima Komisije.

Upis podataka iz stava 3. tačka 4. ovog člana vrši se neposredno, bez provođenja upravnog postupka, upisom u Registar na osnovu izvještaja i obavještenja koja se Komisiji dostavljaju na osnovu zakona i drugih propisa.

Prijava upisa podataka iz stava 3. tač. 1.- 3. ovog člana smatra se, u smislu odredaba ovog

pravilnika, obavještenjem, u skladu sa članom 12. stav 1. tačka 1. i članom 21. Zakona o Komisiji za vrijednosne papire.

Član 3.

Za upis i promjene upisa podataka u Registru kod Komisije, koriste se slijedeći obrasci:

- | | |
|--|-----------|
| 1. Prijava sa priložima | Obrazac 1 |
| 2. Registariski listovi | Obrazac 2 |
| 3. <i>briše se</i> | |
| 4. Izvod iz Registra kod Komisije | Obrazac 4 |
| 5. Uvjerenje o podacima iz Registra kod Komisije koji su prestali važiti | Obrazac 5 |
- Obrazac sa priložima iz stava 1. tačka 1. ovog člana nalazi se u prilogu ovog Pravilnika i čini njegov sastavni dio.*

Oblik i sadržaj obrazaca sa priložima iz stava 1. tačka 2 - 5 ovog člana, te način elektronskog vođenja Registra kod Komisije utvrđuje predsjednik Komisije.

Obrasci za prijavu upisa mogu se dobiti u sjedištu Komisije ili na web stranici Komisije.

Član 4.

Prijava i prilozi uz prijavu služe za upis podataka koji se odnose na podatke iz člana 2a. stav 2. i stav 3. tač. 1.-3 ovog Pravilnika.

Član 5.

Registariski listovi služe za upis podataka u Registar kod Komisije i čine sastavni dio originala i prepisa rješenja o upisu u Registar kod Komisije.

Registariski listovi služe za upis podataka iz člana 2a. stav 2. i stav 3. tač. 1.- 3 ovog Pravilnika.

Sadržaj svakog broja registarskog lista istovjetan je sadržaju odgovarajućeg broja priloga uz prijavu.

Registar emitenata vodi se i u elektronskom obliku u koji se unose svi podaci iz člana 2a. ovog Pravilnika.

Član 6.

Obrazac izvoda iz Registra kod Komisije služi za davanje podataka iz aktivnog dijela registra emitenta, na zahtjev zainteresovanog lica.

Izvod iz Registra kod Komisije sadrži posljednje podatke upisane u odgovarajuće registarske listove iz aktivnog dijela registra emitenta.

Član 7.

Obrazac uvjerenja o podacima iz Registra kod Komisije služi za davanje podataka, koji su prestali važiti, iz pasivnog dijela registra emitenta, na zahtjev zainteresovanog lica.

Zahtjev za izdavanje izvoda i uvjerenja sadrži: ime i prezime, odnosno firma i sjedište podnosioca zahtjeva, registarski broj emitenta i podatke koji se traže.

Izvod i uvjerenje o podacima iz Registra izdaje se samo o podacima koji se upisuju na osnovu rješenja Komisije.

2. Način kompletiranja prijave za upis

Član 8.

Prijava za upis podnosi se Registru kod Komisije u kompletu, koji se sastoji od:

1. prijave za upis i odgovarajućih priloga uz prijavu;
2. isprava, originalnih ili propisno ovjerenih kopija, kojim se dokazuju činjenice i podaci navedeni u prijavi i evidencijskim listovima.

Prijava i prilozi se podnose u jednom primjerku.

Član 9.

Prilikom podnošenja prijave za upis, prijave promjene upisa, zahtjeva za izdavanje izvoda ili uvjerenja, obavezno se prilaže i dokaz o uplati naknade, u skladu sa *aktom Komisije kojim se reguliše tarifa naknada.*

Član 10.

Prijava promjene upisa u Registar kod Komisije sadrži obrazac prijave i odgovarajući prilog uz prijavu u kome se nalaze podaci koji se mijenjaju.

Uz prijavu promjene, prilažu se isprave kojima se dokazuju odgovarajuće promjene.

Pri popuni prijave i priloga uz prijavu, popunjavaju se i one rubrike kod kojih se ne vrši promjena podataka, tako da evidencijski list bude kompletan.

Član 11.

Brisanje emitenta iz Registra kod Komisije vrši se na osnovu prijave emitenta ili *po službenoj dužnosti*.

Zahtjev za brisanje emitenta iz Registra kod Komisije, sa priloženom odlukom ili drugim aktom koji je osnov za upis brisanja, podnosi ovlašteno lice emitent.

Član 12.

Ako se određeni podaci ne mogu u cjelini upisati u neki od priloga uz prijavu, za taj prilog koristi se "pomoćni prilog" kao nastavak.

Za upis podataka koji se ne mogu u cjelini upisati u neki od registarskih listova, za taj registarski list koristi se "pomoćni registarski list", kao nastavak uz registarski list.

3. Način popunjavanja prijave za upis i priloga

Član 13.

Prijavu za upis u priloge popunjava podnosilac zahtjeva pisaćom mašinom ili uz pomoć računara, s tim da se upisani podaci ne mogu precrtavati niti brisati.

Popunjavanje prijave za upis i priloga vrši se na osnovu podataka iz isprava kojim se dokazuju činjenice i podaci navedeni u prijavi i moraju biti istovjetni podacima iz tih isprava.

Član 14.

Svaki emitent u Registru dobiva brojčanu oznaku, po kojoj se razvrstava u grupe emitenata, i to:

- 1. dioničko društvo (uopće)- 01;*
- 2. banka i društvo za osiguranje- 02;*
- 3. investicioni fond-03;*
- 4. društvo za upravljanje investicionim fondovima- 04;*
- 5. Bosna i Hercegovina- 05;*
- 6. Federacija Bosne i Hercegovine- 06;*
- 7. drugi entitet u Bosni i Hercegovini- 07;*
- 8. Brčko Distrikt Bosne i Hercegovine- 08;*
- 9. kanton-09;*
- 10. općina- 10;*
- 11. društvo sa ograničenom odgovornošću i druga pravna lica koja po zakonu mogu biti emitenti vrijednosnih papira ili se upisuju u registar emitenata- 11.*

Registarski broj emitenta čini broj iz stava 1. ovog člana i redni broj upisa u Registar.

III - RJEŠENJE O UPISU U REGISTAR KOD KOMISIJE

Član 15.

Nakon što ovlašteni radnik Registra kod Komisije utvrdi da su ispunjeni uslovi za upis, vrši popunu odgovarajućih registarskih listova i izrađuje prijedlog rješenja o upisu.

Rješenje o upisu u Registar kod Komisije donosi Komisija.

Komisija može odobriti promjenu oblika dioničkog društva u društvo sa ograničenom odgovornošću, izuzev ukoliko se radi o otvorenom dioničkom društvu iz člana 107. Zakona o privrednim društvima ("Službene novine Federacije BiH", broj 23/99, 45/00, 2/02, 6/02, 29/03, 68/05, 91/07 i 85/08).

Član 16.

Rješenje sa priložima donosi se u četiri primjerka kao izvornik rješenja, od kojih se dva primjerka uručuju podnosiocu prijave, jedan primjerak se dostavlja Registru vrijednosnih papira u Federaciji

BiH, a jedan primjerak se odlaže u Registru kod Komisije.

Emitent je dužan da, u roku od 8 dana od dana nastanka promjene, prijavi Registru kod Komisije promjenu svih podataka koji su upisani u Registar kod Komisije.

Član 17.

Svako zainteresovano lice ima pravo uvida u podatke sadržane u Registru kod Komisije, *u skladu sa zakonom kojim se reguliše sloboda pristupa informacijama.*

U isprave i druge akte iz omota zbirke isprava emitenta može se izvršiti uvid, ako za to postoji opravdani interes, a po odobrenju predsjednika Komisije.

IV - PRIJELAZNE I ZAVRŠNE ODREDBE

Član 18.

Briše se.

Član 19.

Briše se.

Dionička društva i druga privredna društva koja se privatiziraju u postupku javne ponude dionica, u skladu sa Zakonom o privatizaciji preduzeća, upisuju se u Registar kod Komisije, na osnovu izvještaja o provedenom postupku privatizacije, nadležnih agencija za privatizaciju.

Dionička društva koja su predmet privatizacije u skladu sa Zakonom o privatizaciji banaka, upisuju se u Registar kod Komisije, na osnovu izvještaja o provedenom postupku privatizacije, Federalnog ministarstva finansija-Federalnog ministarstva financija.

Član 20.

Ovaj pravilnik stupa na snagu osmog dana od dana objavljivanja u “Službenim novinama Federacije BiH”.